

نَعشْ گمره

شعر شعبي

خالد العارضي

هوية الكتاب

عنوان الكتاب : نعش كمره

المؤلف : خالد العارضي

سنة الطبع : ١٤٤١ هـ - ٢٠١٩ م

الطبعة : الأولى

جميع الحقوق محفوظة للمؤلف

التنضيد والأخراج الفني والطباعة
4D

للطباعة والنشر والتوزيع

النجف الأشرف. حي السوق. مقابل حي عدن

٠٧٨١١٤٠٩٠٣٠ - ٠٧٥١٠٩٥٤٤٩٥

qusay.alshmary@gmail.com

الإهداء

* إلى أحرار العالم والضمائر الحية

* إلى مدينتي الشنافية والجمال

* إلى والدي العزيز جودي كريم زلف

العارضي

* إلى أُمي مصدر الضوء والحنان العظيم

* إلى شعراء مدينتي الكرام ومحبي السلام

الشاعر في سطور

- خالد جودي كريم العارضي
- ولد في محافظة الديوانية بتاريخ ٢٢ / ١٠ / ١٩٩٠
- عضو الإتحاد العام للأدباء الشعبيين فرع الديوانية
- رئيس منتدى شعراء الشنافية
- عضو رابطة شعراء الشنافية

المقدمة

وأنا أعيش أحلام اليقظة ذات غروب من صيف
عام ٢٠١٩ م ، واذا بسحابة ممطرة تزخ قطرها على
وجهي ، فإنتفضت كعصفور بلله القطر ! نعم ، أنه
شاعر من الشنافية الشجرة التي ابت ان يسقط الخريف
وريقة منها، مدينة كرم وسلام واصل وأصول .. ولكل
شجرة أغصان وهذا الشاب من أشخصها ؛ لأن بُنيت
عليه عشوش الإبداع، وأنجبت الكلمات أشعارها ، فغرد
لها قبل أن ينمو عليها ريش التحليق في سماء الأدب .
أنه خالد العارضي الذي عاش في كنف الشنافية
وشرب من شطها الذي يتوسط قلبها.

ببهجة عارمة امتطيت قلمي وأخذت اكتب ، دون
أن امخر حياة هذا الرجل ؛ معتمدا واتقا أن البيئة كفيلة
بصنع الرجال ..

وأنا اكتب ذي المقدمة والقلم وجود بي بين الكلمات ؛ لا يعرف ماذا يجلب من كلمة تليق بهذه الرقعة الجغرافية ما فيها وما عليها ! فإرتأيت أولاً ان اسرد لكم شيئاً من حياة الشاعر :

اسمه : خالد جودي كريم زلف العارضي ، وأسمه الأدبي خالد العارضي المولود سنة ١٩٩٠ ، من محافظة الديوانية – قضاء الشناقية بدأ الشعر والحب له في سنة ٢٠١٠ م ، ثم انتمى الى الإتحاد العام للأدباء الشعبيين في محافظة الديوانية سنة ٢٠١٢ م ، وإجتاز الأختبار بجدارة عندما دخل في إمتحان مع الشعراء في محافظة الديوانية وكان وليد الشعر وقتها ، ومنح هوية شاعر ، وشارك في مهرجانات عدة منها على صعيد محافظته ومنها خارجها ومثل مدينته بما يملك من قوة الحرف ، ولا يكف عن ذكر شاعر يلهج به على لسانه ويذكر فضله على نفسه ويعتبره استاذة فهو الشاعر محمد حامد الكعبي المسمى ادبيا (محمد

الفراتي) ، إلى جانب ذلك شعراء مدينته يحفظ لهم الإحترام المستمر ، وما زال يزاول كتابة الشعر والولاء له ، وإن هذه أول مجموعة شعرية له ، ونرغب مزيدة .

وبعد ما تعرفنا على حياته أقول أن الشعر هو رسالة أو بحث لأبد من هدف أو معالجة أو تحفيز أو صنع أو ابتكار .. وما شابه من النبل الإنسانية القيمة والخلق الدينية المنزلة والمؤيدة ، ولكن بقوالب ترقص لها الذات ، وينشرح لها الصدر ، وينير لها العقل ، وإن خلا الشعر مما سلف ذكره سلفا فقد كان كلاما ساذجا فقيد الذوق و الجمال والشاهد ، وهذا يشمل الشعر العربي الفصيح أو الشعبي المحترف .

وبما إن هذه الأشعار كتبت بلغة شعبية عراقية وسطية، حتما يكون لها مكانة ذوقية مائعة المستوى ، فالشعر الشعبي المحترف : هو أدب تراثي وحضاري وثقافي ينتقل عبر مدارس شعبية وقامات أدبية ناصعة

، ويحمل بين طياته نوايا الشاعر وأهدافه ومقاصده
وهومومه أو هموم شعبه أو امته ، وذلك يكون اما
بلسانه او عن لسان آخر ، ولكن بقلمه وبتجارب
رصينة النظر .

وعلى القارئ لهذه المقدمة ان يعرف انها اولى
المقدمات بالنسبة لي ، ولم أكتب قبلها قط ، وان يعرف
موقفي من الشعر الشعبي : لأن لم أقرأ ديوانا كاملا
من الشعر الشعبي ، رغم أنني طالعت في أول أيامي
بعض الدواوين . وموقفي منه أقف على حياد وأحترم
ما جاء منه بلغة شعبية محضة غير هجينة وينقل
الشاعر ألفاظه المتداولة بين أبناء محيطه ، مراعيًا
طبقات المجتمع الآخر، استمع للشعراء الكبار وأخذت
فترة من الزمن في مرحلة الجامعة انتقد سلبيًا نصوصًا
لشعراء كبار ذاع صيتهم وأحببهم الناس !...

وهنا أود باختصار أن أفسر مصطلحا مزدوجا
وهو (الشعر الشعبي) : الشعر من الشعور وكل إنسان

لديه شعور ، ولكن منها من يعجز ان يصب هذا
الشعور بقالب من قوالب الشعر المتاحة والميسرة لدى
الشاعر والتي بإمكانه الوصول إلى مبتغاه ، أما الشعبي
: فهو مصطلح وضع للتمييز بين الفصيح المكتوب
بالعربية الفصحى و الشعبية التي أخذت من الشعب ؛
لأن الشعب أغلبه بل كله يتكلم لغة هذا الشعر ويفهمه
دون تفسير أو تحليل وتصل الكلمات الى مرماها من
دون مشقة ، لهذا نجد يسمى الشعبي ؛ للغته
الشعبية . كلنا على دراية تامة ان الشعوب العربية لا
تتكلم بلغة فصيحة ، بل لغة الخطاب الشعبية العامة ،
والعامية العراقية من أجمل العاميات العربية وأعذبها!.

(نعيش كمرّة) العنوان الذي توشح به الشاعر لهذه
المجموعة الشعرية وأعتقد أنه الأسم الأول من نوعه ،
فلم أسمع مثله فيما سبق.

سنمر على بعض ما بدأ به الشاعر من أشعار
مروراً وجيزاً فهي أشعار وطنية وذاتية وحسينية قومية

يتكلم الشاعر غالبا عن نفسه ولا سيما في بداية أشعاره
ويلقي كل شيء على عاتقه ويضع نفسه مسؤولا ،
ودليل ذلك إليك بدايات أغلب القصائد (يا عراق أنت
حبيبي ، ينجمة شوفي ، أشتهيت أشرب ، شلي بروحي
، خليني اشيلن ، أصفن ، فشله أگول ، ..) فهي
خطابات من ذات الشاعر ، وان كل قصائده من الشعر
المفتوح ألا وهو الشعر الحديث ما عدا ثلاث او اربع
قصائد جاءت عمودية، وربما دلالة اخرى على
خطابات الشاعر مثل ما جعل كل شيء ملقى على
عاتقه وجعله مفتوحا لتلقي كل ما يدور في بلاده ودينه
أذ جعل الشعر مفتوحا ايضا كعاتقه!

قدم الشاعر حب الوطن على كل المقاصد ويبدأ
بنداء للوطن بواسطة ياء النداء فقد قال " يا عراق انت
حبيبي " هذه دلالة على وطنية الرجل ، ثم يعطي
للعراق أعز ما يملك البيت العراقي وهو صوت الأم
المعبر للفرح (الهلاهل) فقد قال "أنت تستاهل هلاهل

أمي " فلم يكتف بهذا فقد أردف بكلام أبيه " ولأب
العراقي كلمات تدخل القلوب من دون استئذان . وبعد
ذلك يقول : "وماي وجهي" و " ورأس اخوي " فقد
تفدى للعراق بكل ما يملك .

اما في قصيدته الثانية بعد العراق وحب الوطن
جاء بقصيدة بحق وصي الرسول (ص) . ألا وهو
الإمام علي (ع) وبنفس حرف النداء وسنعرض بعضا
من الاقتباسات:

" علي الناداك تفزعله طواري الله "

نعم ، أنه علي ابن ابي طالب ، الذي استجار به
الرسول قائلا : " يا علي مدد .. " وهنا قول الشاعر
يحاكي قول الرسول . " علي تعطش خواطرنا
ونرويهن بظل طاريك " جميل بل رائع ؛ لانه الخطاب
كان بصورة عامة والجميع يحب الأمام ويعطش لذكره
ووظف علاجاً للعطش وهو ظل طاري الإمام يكفي

المحب الحقيقي اي أنه فقط أن تتذكره في خيالك ، نعم
هكذا ، هم آل البيت.

وفي قصيدة بعد هذا تحت عنوان (باب الطف)
جاء فيها على شكل حكم وأمثال اذكر أجملها : " اليزم
الكنطرة يحتاجها بعبرة "

القصيدة الرابعة التي جاءت بعنوان فيه نوع من
البيان (جنازة هيل) ويبدو أنه ودع الشاعر أعز ما
عنده والذي وضع له لفظة هيل استعارة للطيب والعطر
الفواح .. ثم يتكلم بوجع ، ما أن تصل ألى منتصف
القصيدة يجده بغير الخطاب من الضمير الخاص به
(يشوفي ، فز بروحي ، الخذاك منيدي ..) ينتقل الى
خطاب آخر اكثر حزنا: " يبني الكبر طيحت حيل ،
يبني اللحد مو حضني : " .

(ماي وحزن) عنوان القصيدة الخامسة التي
جاءت محاكاة لواقع حزين ومعاناة الشعب وعلى
طبقات المجتمع كافة : " أطفال رضع وأم جبيرة و أبو

شايب ، و طفلة ما شافت مدارس .. " فقد وجه المعاناة
على الجميع ثم خصص الأكثر وجعا وهي الطفلة التي
تبيع الماء وعلى شكل مستمر في كل صباح يتوجع
الشاعر بهذا المنظر الأليم وفي ختام القصيدة يخاطب
الحسين (ع) يقول : " يا حسين وجم رقية الغاعدة
بحضن التقاطع ، واحنا يم نحرك نطوف " خطاب
شجاع ينتقد الذين يدعون بحب الحسين ويتركون
اليتامى تموت جوعا في شوارع بلاده !

وهكذا بقي الشاعر يتكلم عن نفسه ومعاناته
وتجاربه الحياتية وسأقف عند القصيدة الثامنة التي جاء
عنوانها (وطن وأحلام) فيقول :

خليني أشيلن ورد

مو كافي اشيل اسلاح

فيدعو الى الحب والسلام وترك البطش والموت
مستغربا من كثرة دعاة الأسلحة .. فالقصيدة عمودية

من أجمل القصائد التي يحكي ألمه بتذمر وحزن
شديدين .. ودليل ذلك قوله :

لتغلي بس انتظر

شنتظر ؟ عمر وراح !

والى غير ذلك من الشعر الحسيني بحق السيدة
رقية و السيدة زينب (عليهما السلام) وما في ذلك من
أشعار الحزن والولاء والإمتثال في مقاصد الشاعر في
شعره .

أتى الشاعر بألفاظ شنافية مليحة اللفظ جميلة
المقاصد ويلبسها استعارات غير معناها التي وضعت
له مثل ذلك كثير ناخذ قصيدة (ضد الظلام) فيبداها "
الناس (عتگت) فكلمة عتگت لها معنى جميل ومليح في
الوسط والجنوب ، وغير ذلك في قصيدة (ما ننزل)
يقول :

" سرنا والعبي مرايات .. "

نجد كلمة (العبي) رائعة ولها مكانة جميلة ولفظة
نادرة ..!

تنوع في مواضيعه فلم يقف عند ما ذكرنا ، فقد
كتب قصيدة عمودية يرسم فيها حلم الحبيبة لحبيبها
الذي استشهد وما أكثر هذه الحادثة في العراق ! وكم
حبيبة فقدت حبيبها ! فارس أحلامها ونديم حديثها .
ويحكي بلسان المحبوبة ومن تلك الأبيات:

" محبوبي الهوا ويفزع لكل مخنوگ

موتايه عشگته لكل عطش روابي "

ثم انتقالات في الحب الجميل و الغزل المسموح
العذري بقصائد مفتوحة يقطنها على الأغلب كلمات
شنافية عذبة، أستوحاها من الشارع الشنافي الجميل .
لم ينس الشاعر مدينته التي انجبته والذين وقفوا معه
وتكلم عن كرمها وطيبها بقصيدة (طيب أهلنا) .
يبدأها بتفاخر بنفسه ؛ لأنه ينتمي لهذه المدينة وقوله :

أنا ابن المدينة الماترد خطار

أهلها أويانا تفزع الليمر بينا

"وبعد ذلك لم يتهم نفسه بالمغالاة ، بل يستشهد
بوسام الكرم (الدلة) فيقول :

" ما بالغ بحجبي وهذا واقع حال

وإدلال المظاييف تشهد علينا

ويبدو لقارئ قصيدة الشاعر العارضي (مسامر طيف) أنه فقد شخصا عزيزا عليه ! وودعه بالتراب ، إلا إنه ما زال يرقب قدميه ! حيث يقول :

"مثل كل يوم روحی تحن

مثل كل يوم اتانيكم

تعالوا يالْمَشِيِّتُوا بَلِيل

چم نجمة التغذية

ثم ينتقل إلى خيبة حلمه فيقول :

تفطر حلمى مثل الغاع

من يبست سواجيكم

ثم ينعى ذلك الشخص الفقيد بحزن وأسى وقلم
يتوجع له ! وأن دل هذا فهو وفاء الشاعر للإنسان الذي
يحبّه ان كان ذكراً أو أنثى !

(نعش گمره) عنوان لقصيدة ونفس الوقت عنوان
المجموعة الشعرية ، اذا لهذا العنوان اثر كبير في ذلك
الشاعر ، فهي قصيدة تذكارية ذاتية يظهر بها انه على
العهد والوفاء وما زال هو هو . منها :

هاك واتلمس اجرّوحي

تلگه لسه النرف حار

تلگه لسه الملگه حار

مابرد بالروح كلشي ..

الى اخر القصيدة مرة يجد نفسه لا شيء هو
لايعرف كيف ؛ لأنه قال :

وانا اضيعن من اشوفك

مدري ليش
عود ليش ..

وهكذا النصوص الأخيرة كلها في الحب والجمال ،
الا انها دائما تصب الى الفراق والترك ، ومنها
محاولات للنسيان رغم أنه يصف نفسه بقصيدة (عشگ
مجنون) . والتي بعدها يضع عنوانا لها (خسارة حب)
والتي كانت ختاماً لهذه المجموعة ، ويملاًها التحذير
للمحبة وعليه معرفة قدرها ، والشموخ بنفسه
والعنفوان ، وهكذا الخطاب للشاعر مع الحبيب ويصفه
بصفات أو يظهره أقل منه ، نستدل على قولنا

عوف گلبی إحساسی مو لعبة بديك
يلي عشگك مو صدك چذابي
يحذره هنا ثم يقلل من شأنه بقوله :
" أنت ما تعرف تحب بعدك زغير "

وعلى هذا المستوى الشعري يختم قصيدته
العمودية الأخيرة !

وفي الختام وقبل السلام أقول قد مررت مروراً
سريعاً على أشعار هذا الشاب ، وما ذكرته نخبة منها
وأرجو أن يقبل القارئ هذا التهميش السريع غير
المنطّب والوجيز ! وأكرر كلامي أنني لم أكتب مقدمة
سلفاً قط ولست من سامعي الشعر الشعبي ، وتخفى
علي أغلب شروطه الموسيقية ! هذا ما لدي وما أفهمه
من اللحظة الأولى معتمداً على البداهة في ذوقي
البسيط . والآن أرجو لصديقي الشاعر خالد العارضي
تمام الشعر وجودة الحرف ، و نفحة البيان .. أرجو أن
أراك يا صديقي في المراتب العلى مما ترغب بما
يرضي الرب الكريم . كتبت هذه المقدمة بفخر شنافي
، ونفس تملأها العزة والإباء ! الحبيب خالد نرقب
مزيدياً في مجموعة شعرية أخرى . وأختم قائلاً سلام
على الشعر والشعراء والقراء .

محمد عبد الزهرة محسن

٢٠١٩ / ٩ / ١١

العراق

يا عراق أنتَ حبيبي

وأنت تستاهل هلاهل أُمِّيَّ

وحچايات أبوي

وماي وجهي وراس اخوي

وانت حيدر مِنْ زمان

ضاگت الغّاع ابوسعها

وانت بعيونك مچان

باگو النجمات منك

وأنت تطيهم حنان

كلنه فدوه

أحنه فدوه

المات فدوه

والعدل يزرع أمان

وأنت ذاك الدهلة ماتروي ظمالك

وأنت ذاك

صافي أعرفك وأنت ذاك

حسين برقية إشتراك

يندل الجروح

علي يا حلمة السمرة
علي سگف الندى يالجامع الفقره
علي الناداك تفرعله طواري الله
وحيل سنين ماينمل
وكشخه وعافية ومطرة
علي يملوحة الاذان
تجري اعله العطش كمره
علي الرادك وسادة ماي
يستاهل حضن كبره
الماشافك برودة كاع
يخلص كفض كل عمره
علي يا ستر الحديثه وخلق يوسف
وصفنة ليل يغزلها ويذم فجره

علي الوازوك طاحوا صوت
حصدوا چلمة الماكو وحلال الهم
وانت عيونك ابشاره
اليدليك بطريق جروح تكفلهم
وانت الكل نفس عبره
علي تعطش خواطره ونرويهن بطل طارق
من ايمر عصر رايح
وانت المو الك عطره
يالدومك تخضّر صوت
وأبد ماخضرت سكته
وما اقنع توازي الغير
انت الإلك ماخذته

باب الطف

أسبگ للنفس طاري
وأطیح بكل جفن دمعہ
من ایمر خلگ بسمار
وأعثر واهس أحديثه
ابخت كل نار
من فزعوا ظلام اعلیـچ مایدرون
بابـچ وجه الله ورادوا یحرکون
الکشخوا بالفشل للضيف شیعزبون
ماحسبوا وتاهوا صوت
الیزم الكنطره یحتاجها بعبره
الأعمه بماي كصته یشتري النظره
ولاشرای صح الهه
التموت براسه كمره بیش یعدلها

جنازة هيل

ينجمة شوفي من بدوك
فز بروحي كل غافي
وملك الموت هم يندل
يركض عالكلف حافي
الخذاك من أيدي گوم وياه
خصمه شارة اجتافي
الولد لمن يشح بالشيلة يطلع شيب
ترى التابوت عشرة ليل
يبني الغبر طيحة حيل
يبني اللحد مو حضني
ما يشهك اذا تزعل
تعال اتبدة بجروحي
يبخت عگال يمدل

يفيي شلون تجفيني
يترجية بنات حسين ميت واهس اسنيني
واحشمنك رمش متعوب
ماضايگ ملح عيني
تهيض بيه وناتك واخضر مغيرة بحالي
السبي والخيمة هم كلفه
بس اكلفهن الوالي
يالوجهك كصيبة طيف
اجيك واعثر بشمعة
اشتھيتك متن من احظه
بعباية شمس مو دمة

ماي وحزن

من تقاطع سوكنه وتبدي الجروح
اطفال رضع وأم جبيرة وابو شايب
وطفله ما شافت مدارس
واني كل مصباح اشوف
تبيع ماي اعله الرصيف
تصبح ماي هذا ماي
هذا ماي من الشريعة الماي بارد
واني كل مصباح اشوف
تصبح ماي
هاك عمي اشتري ماي
هاك عمي اشتري مني واستر ايتام الطفوف
واني كل مصباح اشوف
حركت اخيمنه السياسة وكربله طلعت تجاوز

شربت ادمانه السيوف
ياحسين وجم رقيه
الگاعده بحضن التقاطع
واحنه يم نحرك نطوف
يا حسين الشمر عايش لابس اعمامة ابوك
ياحسين الدين فشله
الما يسد جوع الفقير
ياحسين وانت تدري مانحب دين الكراسي
نريد من دين الحصير
عشنه مختنكين عوز واحنه جم شباج عدنه
وما فزع لينه الضمير
وياحسين انت الضمير

انت عايش

اشتھيت اشرب خلك مايك
يالصايغ شمس سمره بوريدك للمصلايه
واعطشلك نفس غرگان
ومتوازي او نشف رايه
وهذاك انت الفرع شطين
الخضر كل هوى بمايه
ولاميت واطل التم
افياي دموع يم حيلك
حتى لو نشفت انشم
واتيهن بيك وانه اندل
واليتيه الضوه ينذل
ودين بركبت المتعوب
للشامرله حيل وحل
ويخير الله الحوا قرآن مو منجل

خيامك سولفن دربين بس دخان
شفناه الذنب بينه
غشمه وماعرفنه نشوف
عالكيز وتوازينه
وبعدني اتوازه وي روي
واعثر بالضوه المنك
يحسين الصبح مكروه
باكونه الحجوا عنك
ويخضر طفاك بعيني
وسافر لليتامه امتاع
وذمن كل حجي المبيوك بسم الله
واكره كل منايرهم اذا فزرن جرح الكاع
وتظل هواي ماتتعد
بين النار والجنة جدم مرود

نهر نادم

شلي بروحي الدرت بحسين
ما فزعتله ضل غيمه
ولاشالت حوافر ليل
ولاروت نفس خيمه
ابوكت بينه الفرع محظوظ
خضر بيه طاري الله
ومشه عنه العطش لبعيد
من جان العمر هيمه
وانه ادري حلال الهم
الفرعوا بالطفوف سيوف
صاغوا فجر من دمهم
وتمنيت اصيرن منهم تمنيت
ولاجر في التدنه وحسبت اني امشيت

ولاحشمت حيلي ايگوم لوحافي
ولابختي الخذاني بنارهم طفيت
بعد شيفيد

صرت إعله الخيام ابعيد
وانه أدري الشريعة احديثه
بس تخون

سوت جرح مايشفه
جرح جبير ماينراف بالوسفه
ولا ينزر بجلمة خيط
الماجارح گمر مايعرف الكلفه

وطن وأحلام

خليني اشييلن ورد
مو كافي اشييل سلاح
خاصت عمري حرب
كلي شوكت ارتاح
لتكلي بس انتظر
ش انتظر عمر وراح
توعدي باجر فرح
والحزن كل مصباح
والليل حبيه جذب
ماعان كل الطاح
ونگصّه شجر الجذب
ويخضر السباح
ونذب حلمي امس

وأسمع براسي صياح
والوطن صاير جرح
حتى الفرح بي ناح
وأحلامي نصبن عزه
وعطر المصابيح فاح
واحساسني يزرع أمل
ويشتم عطر قداح
والكرسي واحة ظلم
والطاغي بي فلاح
مالاحه جف العدل
جف الحرامي اللاح
أنه ابلد بي علي
بس بي ألف ذباح

الدم نصر

يارقية اليعطش ايلوذ بأبوچ
الوجهه چم شاطي شذر مالاچه طين
وانه ادري الماي جدمه
اتفرع الكاع المشه عليها بهلاهل
واني ادري العطش ضيف
وانتي عزبتي بأبوچ بكل حنين
يا رقية اطيبي ترجيتج هديه
للعدوا المحتاجها
وانتي لميتي الهوه
من اشفاف اخوتج
للطلب منچ نفس
عفيه يا بت البقه بكل السنين
بارده الكاع ونختكم

صارت اخيامچ دفوا
وانتي خليتي الظلام
بنحر عبد الله ييبوك
وصحتي يا عمي دخيلك وانه اسمع
يابو فاضل جم شريعة الشدت بزندانك عليك
وچم شريعة الشربت اچفوفك ستر
وعفيه رايك يابو فاضل
ينشرب كلما عتك
وانه ادري هذا كله بمشتهاكم
كلشي بالطف ماجراكم
يارقية الدم نصر

الغريب

اصفن مناير هوه
وبالروح چم شيطان
واتعاند وية الشمس
ووكع اباطري آذان
هذا انه چلمة بخت
بگعدة شيوخ وحلت
چانون اهوه اظل ويدفي كل بردان
ومتوازي اصيرن كحل بعيون كل نجمه
وافزع نفس غركان
طبعي رهاوت نفس
كلبي اليجرحه سمح
شایل خلگ ديوان

عطشان مجبور اظل
ملگه المغيسل ماي
ويخضر الدفان
طبع الجگاره حلو
مذموم بس من تشح جن انت فاگد نبي
براسي ذنب حرمله لابس عباية سبي
والگاع من تنجرح تطلب فصل مسحاه
والفشلة لو فرعت ما تغطيها عبي

سفرة حلم

آه زينب

فشله أكل منين ماجيج بدرب

بيه أشم إخيام مختنكة بدموع

إدموع عفه مشيله

وَمَاي عطشان أعله ماي

وَظلمه دربي الشمعة ذابحها الخجل

وَأني أمشي وَأني أشوف

جَفْ عَرش فَأكد فجر

وراي ذابحله عُمر

وحضن بي ريحت محمد

منه باكوا كلُّ هوه

وَطشوا إنجوم الترافه

بمشتهايه إعله الجمر

وَصَوْتُ دِينَ وَلَهْفُهُ وَمَوَادِعُ حَرْبٍ
وَأَنِّي أَمْشِي وَخِفْتُ أَطْبُ
وَخِفْتُ أَشَوْفَن سِتْرَ اللَّهِ يَنْضَرِبُ
وَحَدَيِ ضَايِعَ بَيْنِ أَمْشِي وَبَيْنِ وَاكِفِ
لَبَسْتُ إِدْمُوعَ السَّوَالِفِ
كَبَلُ مَا أَدْخَلَ مَدِينَةَ
اللَّهِ مَتْرُوسَةَ مَضَايِفِ
وَأَنَّهُ أَقْرَهُ بِرَأْيِهِ مَكْتُوبَ الْعَلِيهِ
وَيَنْ رَايِحَ هَذَا حَدَكِ
وَيَنْ مَمْنُوعَ الدَّخُولِ كُونَ يَمِ الْبَابِ وَاكِفِ
كَتْلَهُ إِسْمُكَ : كَالْحَارِسِ
كَتْلَهُ صَنْفَكَ : كَالْحَارِسِ
كَتْلَهُ إِسْمُكَ :
كَالْأَنِيِّ الصَّارِنِ أَجْفُوفِي مَدَارِسِ

كتله حك تصير حارس
إنته يالغفه إعله جودة
الماي وعيون النوارس

غير نصير

أجينه منين

ما بينه اليعرف الضوه من العدلين

اجينه منين

ونه بروحي ظلام وطايح من سنين

اجينه منين

هواية البينة كالوا نندل احنه هواي

بأول طاري سجة وصاحوا متيهين

تهنة او الله ودة حسين

غير نصير

ماي بجربة العباس

حته يروي شفت الدين

وغير نصير

ماي بكصة الصبخه وتخضر تين

وغير نصير

جاري ويضحك اعله الطين
وغير نصير
رأي عكال
يهلي بعثره من تصدف وعبرت ضيف
وغير نصير
طف افياي يم عبد الله وكت الصيف
وانه احجي بشمس مامرتنه بليل
لغة طيف
وبلكي نروج لانيبس نطل دخان
وفشله نصير عود بنار ياهو الجان
الهوا البارد كليط ايوك كل نعان
وانه وروحي مانندل بسفرة ظلمه
مدونه كناطرهم
التايه واليكوده إبليس يهدم كل منايرهم

ضد الظلام

الناس عتكت
وانت يحسين الجديد
وزعت ولدك مناير
والعرش منك يريد
وشبن خيامك خضار
الجان حاركهن يزيد
كون نندل خنصر ايدك
والوڪع نكدّر نلمه
وللعدو ماننطي أيد
رسم حرية وريدك من نرف لجل السماء
رفض دستور القبيله الحلت نرف الدماء
رفض كلشي يعارض الله
يحب كلشي اليرضي الله

مايحب تاج الخليفه الصاغتة جفوف الفقير
مايحب نبقه عبيد
يحب لله إنظل عبيد
وأنت يحسين الجديد

مانندل

سرنه والعبى مرايات

وعدونه يكشخ ابحيله

وفزعنه وماعرفنه نخاف

نرد النجم يم ليله

ومشت بينه السياط ادروب

بس ماحرکن شيله

وبينه شکر تاهت ناس

ندايهه وترد إتيه

وادم ماتحـب تـدل

تريد الفشل له تتكحل
ونسير عالعطش خنياب
ومايعثر بجلمة ماكو كل الصاح
من جان الكصر مريود
سافرته إعله روس إرماح
غاضينه النجم وتنومس الفلاح
ومرها شكذ عطش رايتنه ماذبلت
تظلل خضره
وانه ادري البخت شذره
وادري الدم اشما يعتك
يخضر لو سمع ثورة
وبالطف جم مضيف ايعزب بكبره
الكال خيامكم ماتت
تشبب أفياي

وخضـرنه بـرد عـالكـيظ
وشـلـناه العـطـش
رايه حـته يعـيش ذلـه المـاي
السـاجـيه مـن تـموت تـصـهل
فـز عـة الغـيرـه الـدخـيل
وعـشـنه صـوت لـكل مـنـاره
ومـارـضـينه الـدم ذـايـل

جرح الندھ

عبد الله جم كاروك ضل يبجي عليك

وشجم حزن مشتاك وشجم شيله

عبد الله يحجاية برد فوك الكيظ

طف الله انت من الصعب ترتيله

ضاعت الكاع ونحرك الظل نيشان

مات الخضار ودمك الرد حيله

عبد الله خطارك سهم مامليت

عفيه ابن الجواد اليعزب ليله

كلش زغير اليوصفك والبي روح

كون اليوصفك راسه رمح يشيله

ولايجي بالماي اليمر ابطاريك
يازمزم الله الروه كلشي بجيله
عطشان عبد الله اقتنع هاي شلون
فشله من الحسين اعتذر واحجيله
عطشت الدنيا وجدم عبد الله الماي
وياهو عمه وياهو ابو ودخيله
والظهر دين الله انتفض صار حزام
ابن المضيف المايحب الميلة
عبد الله متكمت فشل منهو يكول
كمت الجيش بجفه هوه وخيله

قالت لحبيبها الشهيد

يا أول حلم زفني لسواجي الموت

ويا أول عشك ماوصل حده الماي

ليش الحرب غفله وخذت مني الشوف

وجاستني المنيه وخذت مني افياي

محبوبي الهوا ويفزع لكل مخنوك

موتايه عشگته لكل عطش رواي

حط الحلقة بيدي والوطن ناداه

صاح ابشر اجيتك انه الك وفاي

وازاني الوطن عالجنّت احلم بيه

بربات المضاييف ماحضت يمناي

واخذ كل المسامر والكممر والليل

وخذ لهفة الحنه وخله جرح اويائي

وياشوك الرسايل من يجيها الطيف

تعثر بالموادع ورد مامش راي

ابيا ذنب الشمع طفيته بالدمعات

وياحسرة البدله الظلت بمكفاي

وانه بلا هله يركض لراسي الشيب

لاجن بت مضيف وضيفي اعزه هواي

اعزاز جروح كلبي من انلجم ارتاح

واتنظر يجيني ويده كل ادواي

وبعدني ارسم بدمعي من يمر طارقك

بدلة زفتي وقاطك وضل ممشاي

وياخذني الدمع وارسم اطفال اثنين

ويغازلني الفرح ومن السواتر جاي

ويرد بيه الهوا وانتفسك وارتاح

واشب اربع طعش وارجع لحيل اصباي

وتغافلني المخدة وتشرب المرسوم

وافزن مستحه وارجع لطف دنيائي

لامحبوبي يمي لا طفل لاعيد

لاصفكة وهلاهل لا دف ولاناي

واكلن ماي موت السكه بدمه الكاع

أحسه بكل شبر والغا نجم بسماي

لا تسافر

وين تريد

ياكاعد بحضني وانه احس بعيد

وين تريد

يرicht عنبر وياكشخت الكيعان

ياليتوضة بيك العيد

وين تريد

اليسمع بالهجر لاترجه منه ايهد

الماعنده ولف مايحس طعم الايد

اخذني وياك

لاآخ نجمه وديني

لاآخ ليل وديني

لاآخ شوف وديني

اليوم الما اشوفك بيه اقولن هاي موعيني

ياشوكك متاع لآخر سنيني
أخذني وياك وين تريد
أخذني أفياء لزلوفك
أخذني لوجهك امرايه
وتبداه اعله طولي طيوف
عيش الوادم حجايه

عاشگینک

تانیٲک تجینی آذان
تره اذنوب العشگ شگره
وگصدلی هوا مبلل
وخضر بیه کل صحره
تراه الطیف یتحنه
واذا منک حلو ومبخوت
وتموت ابدمی جم ونه
واغنیلک سوالیقی
واجذب کل حچی الجنه
ویا رومی الجرح مریود
بس مذموم بالعشره
تعال الکیظ اکل گاعی
واحب منادس المطره

ومتعوبه سواجبي
وانت لروحي مزنة حيل
واتيهن يم دفوا زلوفك
ترى مالي عرف بالليل
ومنين ما تلزمني اخضر
يركض بعمرى العطش
وگالوا المبعد يجي بطاري
الجنازه وماحظت روعي بنعش

ترجيه السمره

زفينه الكمر ترجيه للسمره

برضات الليل

وصرنه متاع للضيع بدربه الحيل

ولانتغر تره التابوت

ركضة خيل

وهيمن بالنشد عالضيع ارسومي

بكفه شراعي

واكود الماي إله شاره ولا ريده بمتاعي

او يتيه الماندل فيي

واغيضنه اليذم كاعي

ولا متباهي طولي يغازل المحراب

ولاملاج صدفه ولاني من راعي

ولاني مغرور بسماري

ولا فزع ماي عله ناري
وحيل الوكن للمضيف حجايه شكره
ودله ماطرها برد
وانه ادري بشوغة الميت رساله
ويعرف الهه المايرد
وعفيه روي
حجايه الوينك خذتني البير يوسف
وعفيه حسبه الماكضت تالي عمر
وانه ادري بلهفت ابليس الخمر

طيب اهلنه

انه ابن المدينة الماترد خطار

أهلها ويانه تفرح لليمر بينه

ما بالغ ابحجي وهذا واقع حال

ودلال المضاييف تشهد عليه

راعي البيت يصبح من يجي الخطار

واسولفلك الحاضر طبع ماضينه

نمد ارواحنه من يحل وكت الجود

هيج احنه وعلي بجود وتربينه

مسامر طيف

مثل كل يوم اتانيكم	مثل كل يوم روعي تحن
جم نجمه التغنيكم	تعالوا يالمشيتو بليل
محظوظ اليا لكم	مشيتو عله الصحاري فياي
من يبست سواجيكم	تفطر حلمي مثل الكاع
عدلين عله طاريكم	تعالوا ياضوه الشباج
جم شهكة التمر بيكم	اهيمن والظنون امتاع
من كد مابجت ليكم	وجم عين الجفاهة الشوف
من اتمرني اساميكم	واركض عالصور ملهوف
بيكم خل يرد بيكم	ويامتن المشه جناز
من يشيل تاليكم	وكل حايط عزيز ايصير
يمنع كل محاجيكم	ومانرضه الأطار ايشيخ
وادري اللحد ياذيكم	عفتونه وعشكتو الكاع
هلبت دمعته ترويكم	وطحنه اعله الكبور دموع

يأنهر الفرح مريود غفله ومات جاريكم
تعالوا لو حلم للعين اريد برمشي اغطيكم
مثل كل يوم روي تحن مثل كل يوم اتانيكم

نعش گمره

سولفتلك

كلشي بيه وكلشي صار
من تذاكره المحطة لآخر اجفوف القطار
سولفتلك

هاك واتلمس اجروحي
تلكة لسه النزف حار
تلكه لسه الملگه حار
مابرد بالروح كلشي
ومايبرد اجروحي ثار
شما يشب الشيب بينه
نرجع العشگ الزغار
أخ يا عشگ الزغار
وانه اضيعن من اشوفك
مدري ليش

عود ليش
وتركض اتدور عليه
والگه خصرک ليه دار
اخ يا عشك الزغار

عشگ مجنون

وين الكاك

تهت وينه الیدلینی

عله فیک ذاک

ارید انساک

بس شلون ارید انساک

یشب بیه العطش

کلما ارید انساک

ویاخذنی الحزن لآخر کبر بالروح

وارد هلال بیدي اشمايمر طرواک

دلینی مجانک وین

دخیلک یالمچانک وین

عالفطره وعشگنه الطین

ماندری وخذانه سنین

خذانه امناطرك لاوين
غفت بينه المحطه
ولاجزانه الريل
وركضنة لصوب اليدلون
ركضة وادم متيهين
ركضة نفس للميتين
وصلناهم نشد بس
طلعوا متيهين

خسارة حب

عوف غلبي احساسى مو لعبة بديك

يلي عشگك مو صدك چذابي

كافي يوميه الدمع يروي الثياب

وانت تضحك ما تداوي اصوابي

انه مالوكن الك وارهم عليك

روح دور غيري لدك بابي

انت ماتعرف تحب بعدك زغير

وانه بين شيبى فوك اثيابي

انت يوميه تحب طبعك عجيب

وانه اريدن واحد من اترابي

ما يجافيني اذا مراني ليل

كون كمريه يشب بعتابي

وجيله كون يصير للمسني بكفائي

وزعل شيخ اشما يطول اغيابي

وانت ما تملك صفه من هل صفات

من الصعوبة تصوير من احبابي

انه اريدن عيد مو لچمه وجروح

ودفوا زلوف ايغازل ابمحرابي

ارد الحگك عالبقن من السنين

لا يخلصن ما حسبت احسابي

روح دور غيري خل يروي ظمأك

صار بس لهل الوفه خنيابي

الفهرست

٣	الإهداء
٤	الشاعر في سطور
٥	المقدمة
٢٠	العراق
٢٢	يندل الجروح
٢٤	باب الطف
٢٥	جنازة هيل
٢٧	ماي وحزن
٢٩	انت عايش
٣١	نهر نادم
٣٣	وطن وأحلام
٣٥	الدم نصر
٣٧	الغريب
٣٩	سفرة حلم
٤٢	غير نصير

٤٤	ضد الظلام
٤٦	ماننڈل
٤٩	جرح النده
٥١	قالت لحيبيها الشهيد
٥٥	لا تسافر
٥٧	عاشگينك
٥٩	ترجيه السمره
٦١	طيب اهلنه
٦٢	مسامر طيف
٦٤	نعش كمره
٦٦	عشگ مجنون
٦٨	خسارة حب
٧١	الفهرست